

## Lija lelijuom

Nugrimzda sauluži ī duburi šila,  
žemeli maluonē prisijiemi tīla  
ī sāpna žīdiejima, rūkanas sklaidies,  
panieri švīsiuoji nuraudusius vēidus.

Juos garbē vužgruoja vuorkestras sparnūtu,  
Ka pāgarba, glaudi, širdžiū atidūtu.  
Vulbieja ī sālpieja, krietī plunksneli,  
Skaistbruvi apkluosti, apkamši sauleli.

Viejelis nustuoja, pardīn žāndus pūti,  
Puo kādugiu siedes, kušieja: sesuti,  
Ilsiekēs auksūta, stiprības pridūsu,  
tāu – sārgu pabūsu, ramībi tausūsu.

Let akes pramērksi rītuo, viel – ī kēli.  
Parmīgus šīpsuojuos avītes – lūpeles.  
Šilkiniem kurlpelīem sapnū karalīste  
Bruolieli žuodelē padieja jāis līsti.

Lizdeliūs nutila kāp gaidas, apsāla  
širdesles paukšteliū, gīduoja kuorāla,  
dungus vartelius atidāri, palēida  
klajuokli mienuži ēšbālusiu vēidu.

Žvaigždeliem prisāki jan sērgieti. Lija  
ī žēmi ramības balčēusiuom lelijuom.